

**Fundargerð samstarfsnefndar  
Sambands íslenskra sveitarfélaga  
og  
Kennarasambands Íslands  
vegna Félags grunnskólakennara**

Fjarfundur var haldinn 5. febrúar 2021 og hófst hann kl. 13:00.

Fundinn sátu f.h. FG: Þorgerður Laufey Diðriksdóttir, Anna Rós Sigmundsdóttir og Silja Kristjánsdóttir, Guðjón Ágúst Gústafsson og Jón Ingi Gíslason.

F.h. SNS Harpa Ólafsdóttir, Ellisif Tinna Víðisdóttir og Bjarni Ómar Haraldsson sem jafnframt ritaði fundargerð.

Þá var gengið til dagskrár:

**Dagskrá:**

**1. Ný lög um foreldra- og fæðingarorlof og áhrif lengingar á fæðingarorlofi á samkomulag aðila um tilhögun fæðingaorlofs kennara og kjarasamning.**

Sérstakt samkomulag er í gildi um hvernig fara skuli með útreikning á réttindaávinnslu, launum kennara og endurkomu þeirra í starf að loknu fæðingarorlofi. Samkomulagið og framkvæmd þess miðast meðal annars við ákvæði kjarasamnings og lög um foreldra- og fæðingarorlof. Breyting á lögum um foreldra- og fæðingarorlof sem tók gildi þann 1. janúar felur í sér að foreldrar eiga nú sjálfstæðan rétt til fæðingarorlofs í allt að sex mánuði hvort um sig vegna fæðingar, frumættleiðingar barns eða töku barns í varanlegt fóstur. Þrátt fyrir framangreint er foreldri þó heimilt að framselja sex vikur af sjálfstæðum rétti sínum til hins foreldris. Til umfjöllunar er hvort og þá hvaða áhrif þessar breytingar hafa á framkvæmd samkomulags um tilhögun fæðingarorlofs kennara og ákvæði kjarasamnings um réttindaávinnslu í fæðingarorlofi.

**Niðurstaða:**

Málið rætt. Afgreiðslu frestað.

## 2. Breytingar á kjarasamningi samkvæmt bókun 6.

Í kjarasamningi aðila sem undirritaður var 7. október 2020 er að finna bókun 6 sem hljóðar svo:

### **„BÓKUN 6 [2020] Orlof og starfsþróun**

*Aðilar eru sammála um að orlofsréttur allra félagsmanna FG verði 30 dagar óháð aldri með óbreyttu fyrirkomulagi hvað varðar áhrif fjölda orlofsdaga á þann fjölda klukkustunda sem ætlaður er til árlegrar starfsþróunar.*

*Aðilar eru jafnframt sammála um að vinna á samningstímanum að endurskoðun á greinum 2.1.6.1, 2.1.6.3, 2.1.6.5 og 10.2.1 er varða starfsþróun og aukinn undirbúning til samræmis við ofangreint.“*

#### **Niðurstaða:**

Málið rætt. Ákveðið að boða til vinnufundar samningsaðila þar sem málið verður til umfjöllunar.

## 3. Hvernig ber að skilgreina vinnuframlag kennara þá 5 undirbúningsdaga sem falla á starfstíma skóla?

#### **Niðurstaða:**

Undirbúningsdagar á starfstíma skóla eru 5. Skólum er heimilt að fella þá inn í vikulegt vinnuskipulag að hluta eða öllu leyti. Lengist þá vikuleg vinnuskylda kennara sem því nemur.

Vinnuframlag á undirbúningsdögum innan starfstíma skóla tekur mið af vinnuskýrslu og vinnuframlagi þann dag sem undirbúningsdagurinn lendir á. Með vinnuframlagi er átt við tíma sem kennari skal verja til kennslu, undirbúnings og annarra faglegra starfa. Framangreint er því forsenda um hvenær skal greiða fyrir viðbótarvinnuframlag með yfirvinnu.

## 4. Önnur mál

Enginn önnur mál.

Fundi slitið klukkan 14:00.